



Biblia alang sa Kabataan motanyag

Sa Gibuhat sa Dios ang Tanang Butang




Gisulat ni: Edward Hughes
Gihulagway ni: Byron Unger; Lazarus
Alastair Paterson
Gipahaom ni: Bob Davies; Tammy S.
Gihubad ni: Christian Lingua
Gipagawas sa: Bible for Children
www.M1914.org

BFC
PO Box 3
Winnipeg, MB R3C 2G1
Canada

©2024 Bible for Children, Inc.
Pagtugot: Mahimo kang mokopya o mopatik niini
nga estorya, ayaw lang ibaligya.


1

Kinsa ang nagbuhat kanato? Ang Biblia, ang Pulong
sa Dios, nagsulti giunsa pagsugod sa katawhan. Sa
unang panahon, gibuhat sa Dios ang labing unang
tawo ug ginganlan niyag Adan.




2

Gibuhat sa Dios si Adan gikan sa abog sa yuta. Sa dihang gihuyopan sa Dios ug kinabuhi si Adan, nabuhi siya. Nakita niya nga didto siya sa nindot nga tanaman nga gitawag ug Eden.



3


Sa wala pa buhat sa Dios si Adan, gibuhat Niya ang nindot nga kalibotan nga puno sa kahibulongang mga butang. Inanay gibuhat sa Dios ang mga bungtod ug kapatagan, humot nga kabulakan ug tag-as nga kakahoyan, nindot nga mga langgam ug mga buyog, mga balyena ug mga kinhason.



Gani, gibuhat sa Dios ang tanan nga ania - ang tanang butang gayod.

4


Sa sinugdanan, sa wala pay gibuhat ang Dios, walay bisan unsa gawas sa Dios. Walay mga tawo o dapit o butang. Wala gyod. Walay kahayag ug walay kangitngit. Walay taas ug walay ubos. Walay kagahapon ug walay ugma. Diha lamay Dios nga walay sinugdanan. Unya ang Dios nagbuhat!



Sa sinugdanan, gibuhat sa Dios ang kalangitan ug ang kalibotan.


5

Ang kalibotan walay porma ug walay sulod. Ug dihay kangitngit sa kahiladman. Unya ang Dios misulti. "Motungha ang kahayag."




6

Unya mitungha ang kahayag. Gitawag sa Dios ug Adlaw ang kahayag ug ang kangitngit gitawag Niyag Gabii. Ug ang gabii ug buntag maoy unang adlaw.




7

Sa ikaduhang adlaw, gihan-ay sa Dios ang katubigan sa lawod, sa kadagatan ug sa mga lanaw ilalom sa Kalangitan. Sa ikatulong adlaw, miingon ang Dios, "Motungha ang uga nga yuta." Ug nahimo kini.




8

Gipatungha usab sa Dios ang mga balili ug kabulakan ug ang mga sampinit ug ang mga kahoy. Ug mitungha sila. Ug ang gabii ug buntag mao ang ikatulo nga adlaw.




9

Unya gibuhat sa Dios ang adlaw, ang bolan, ug ang daghang mga bituon nga walay makaihap. Ug ang gabii ug ang buntag mao ang ikaupat nga adlaw.




10

Ang mga nilalang sa kadagatan, ang mga isda ug mga langgam maoy sunod sa lista sa Dios. Sa ikalima nga adlaw gibuhat Niya ang dakong mamsa ug ang gagmayng bulinaw, ang ostrits nga tag-as ug tiil ug ang malipayon nga tamsi. Gibuhat sa Dios ang tanang matang sa isda aron pagpuno sa katubigan sa kalibotan ug ang tanang matang sa mga langgam magmaya diha sa diha sa yuta, dagat ug wanang. Ug ang gabii ug ang buntag mao ang ikalima nga adlaw.



11

Human niana, misulti na usab ang Dios. Miingon Siya, "Motungha ang mga buhing mananap gikan sa yuta ..." Tanang matang sa hayop ug mga sapat ug nagkamang nga mga mananap mitungha. May mga elepante nga makauyog sa yuta ug kilas nga mga koneho. Siaw nga mga unggoy ug mga buaya. Naggimok nga mga wati ug kiat nga mga milo. Tag-as nga mga giraf ug paraygong mga iring. Tanang matang sa mananap gibuhat sa Dios niadtong adlaw. Ug ang gabii ug ang buntag mao ang ikaunom nga adlaw.




12

Dihay lahi nga gihimo ang Dios sa ikaunom nga adlaw - pinasahi kaayo kini. Ang tanan andam na karon alang sa Tawo. Aduna nay pagkaon sa kapatagan ug kahayopan nga moalagad kaniya. Ug ang Dios


miingon, "Buhaton nato ang tawo sa Atong dagway. Siya maoy magdumala sa tanan nga anaa sa kalibotan."

MAO NGA GIBUHAT SA DIOS ANG TAWO SA KAUGALINGON NIYANG DAGWAY; SA DAGWAY SA DIOS GIBUHAT NIYA SIYA ...




13

Ang Dios misulti kang Adan. "Kaon sa imong gusto diha sa tanaman. Pero ayaw pagkaon gikan sa kahoy sa kahibalo unsay maayo ug daotan. Kon mokaon ka gikan nianang kahoya, mamatay ka gayod."



14

Unya ang GINOONG Dios miingon, "Dili maayo nga ang tawo mag-inusa ra. Buhatan nako siyag katabang." Gidala sa Dios ang tanang langgam ug mga mananap ngadto kang Adan. Ginganlan ni Adan silang tanan. Maalamon kaayo siya kay nahimo man kini niya. Apan walay bisan usa sa mga langgam ug mga hayop nga angayang ipares kang Adan.




15

Unya gipakatulog ug maayo sa Dios si Adan. Gikuha sa Dios ang usa sa mga gusok gikan sa natulog nga tawo. Unya gihulma sa Dios ang Babaye gikan sa gusok ni Adan. Ang babaye sakto gayod nga mahimong pares ni Adan.



16

Gibuhat sa Dios ang tanan sulod sa unom ka adlaw. Unya gipanalanginan sa Dios ang ikapito nga adlaw ug gihimo niya nga adlaw sa pahulay. Didto sa Tanaman sa Eden, hingpit ang kalipay ni Adan ug ni Eva nga iyang asawa sa ilang pagtuman sa Dios. Ang Dios mao ang ilang GINOO, Magsasangkap ug ilang Higala.



17

Sa Gibuhat sa Dios ang Tanang Butang
Estorya gikan sa Pulong sa Dios, ang Biblia,
makita sa
Genesis 1 - 2

"Ang pag-abot sa Imong mga Pulong nagahatag og kahayag." Salmo 119:130

18

Ang Kataposan

1



60

19

Kini nga estorya gikan sa Biblia nagasulti kanato bahin sa kahibulongan nga Dios nga nagbuhat kanato ug gusto Niya nga kita makaila Kaniya.

Nahibalo ang Dios nga nakabuhat kitag daghang daotan. Gitawag Niya kini nga sala. Kamatayon ang silot sa sala. Pero nahigugma pag-ayo ang Dios kanato. Iyang gipadala ang bugtong Niyang Anak nga si Jesus aron mamatay sa Krus ug silotan tungod sa imong mga sala. Unya nabanhaw si Jesus ug mibalik sa Langit! Kon motuo ka kang Jesus ug mohangyo nga pasayloon ka sa imong mga sala, himoon kana Niya! Moanha Siya ug mopuyo sulod kanimo karon, ug mopuyo ka uban Kaniya hangtod sa kahangtoran.

Kon motuo ka nga kini ang tinuod, ingna ang Dios: Ginoong Jesus, ako nagatuo nga Ikaw Dios, ug nahimong tawo aron mamatay alang sa akong mga sala, ug karon Ikaw nabuhi pag-usab. Anhi sa akong kinabuhi ug pasayloa ang akong mga sala, aron mabag-o ang akong kinabuhi karon, ug unya makig-uban ako Kanimo hangtod sa kahangtoran. Tabangi ako nga motuman Kanimo ug magkinabuhi alang Kanimo ingon nga Imong anak. Amen.

Basaha ang Biblia ug pakigsulti sa Dios kada adlaw! Juan 3:16

20